



SAOPĆENJE ZA JAVNOST

Podmićivanje na izborima **Produžen pritvor za A.D. i A.H.**

(Brčko, 11.11.2024. godine)

Postupajući po prijedlogu Tužilaštva Brčko distrikta BiH, Osnovni sud produžio je pritvor za još dvije osobe osumnjičene za udruživanje radi činjenja krivičnog djela povrede slobode odlučivanja birača. Zbog sumnje da su se udružili da bi podmićivanjem uticali na birače da glasaju za prvoosumnjičenog A. D. (59)*, kao kandidata na lokalnim izborima, njemu i njegovom saizvršiocu A. H. (52)*, pritvor je produžen za dva mjeseca usljed opasnosti da bi uticajem na svjedoke i saučesnike mogli ometati krivični postupak. Prije nekoliko dana pritvor za dva mjeseca produžen je iz istih razloga i prema A.R. (46)*.

Tužilaštvo i Policija Brčko distrikta BiH intenzivno sprovode istragu protiv većeg broja osoba zbog sumnje da su se tokom septembra i oktobra 2024. godine, udružili kako bi podmićivanjem birača osigurali glasove za prvoosumnjičenog, kao kandidata za zastupnika u Skupštini Brčko distrikta BiH. Kako se navodi u naredbi o proširenju istrage, nakon što je pripremio određen iznos novčanih sredstava, u namjeri na izborima podmićivanjem birača osigura određen broj glasova i sebi olakša izbor za zastupnika, A. D. je organizirao grupu kojoj je pristupilo više osoba, a koje su pristale da po njegovim uputama vrše podmićivanje birača. Sumnja se da je kao pripadnica grupe A. R. prikupljala i evidentirala spiskove osiguranih birača, koje je predavala organizatoru grupe, dok su joj ostali pripadnici dostavljali osobne podatke birača. Pripadnici grupe su nakon toga preuzimali novac od A. D. i A. R. i isplaćivali birače koji su pristali na takav način glasanja - zaključuje se u naredbi o proširenju istrage.

Podsjetimo, troje pripadnika ove grupe lišeno je slobode na dan izbora, 6. oktobra, uz pretresanje stanova, prostorija i vozila koje koriste. Nakon kriminalističke obrade i ispitivanja u svojstvu osumnjičenih, prema A. R. je određen jednomjesečni pritvor, dok su ostali uhapšeni tada pušteni da se brane sa slobode. Po pritvaranju A. R, Tužilaštvo i Policija proširili su istragu obuhvativši ukupno pet osoba, uključujući uhapšene na dan izbora, organizatora grupe A. D, te u međuvremenu osumnjičenog A. H. Intenzivno vođenu proširenu istragu istražni organi usmjerili su na dokazivanje krivičnog djela Udruživanje radi činjenja krivičnih djela. U okviru proširene istrage, 15. oktobra izvedena je operativna akcija *Kupac* u kojoj su organizator i pripadnici grupe S. T. i A. H. lišeni slobode. Nakon što ih je ispitalo, Tužilaštvo je podnijelo prijedlog da se, usljed opasnosti da bi uticajem na svjedoke i saučesnike mogli ometati krivični postupak, i njima odredi jednomjesečni pritvor. Prihvativši tužilački prijedlog sud im je, kao i ranije prema A. R, odredio ovu mjeru, čije trajanje se računa od dana njihovog hapšenja. Na prijedlog Tužilaštva, trajanje ove mjere prema A. R, A. D. i A. H u međuvremenu je produženo za dva mjeseca. Uz njihovo pritvaranje, Tužilaštvo i Policija nastavili su proširenu istragu u ovom slučaju u okviru koje je za sada osumnjičeno ukupno sedam osoba.

*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.